

# TRANTER UMENS

## PUSPÈ MASTGELS!

Pli defintiv na vai betg. Markus schubregia sia stanza. El va. Jau na sun stada qua cur ch'el ha transportà davent sia mobiglia. Jau era davent. Quai na vul dentant betg dir, che jau n'hai betg abità cun umens en quel temp.

Jau hai fatg in viadi en Austria. Tar amitgs a Vienna. Amitgs. L'abitaziun en il center da la citad – super, era per ir en sortida. Ir en sortida cun umens ha savens per consequenza che il consum da gervosa s'augmenta senza ch'ins po far insatge incunter. E per la damaun suenter vul quai dir, che vegnir or da letg para magari difficil. Ma era qua m'han gidà ils umens. «Hallo, star si!» Han els clamà a las 11. «Nus vulains spaghetti.» Ed avant che jau hai pudì reagir stevan già 5 umens mo en chautschas sut en stanza. Tja, betg mal ensasez. En boxer-shorts hani lura era gidà a far spaghetti ed en boxer-shorts hani mangià e dà in riep suenter l'auter. Tja, betg uschè cool, ensasez. A mai n'han ils spaghetti betg propi gustà, jau avess preferì in caffè ed in jogurt. Ma nagut da jogurt era betg en il Burgenland, en il südost da l'Austria, nua che nus essan viaggiads en 5 il di suenter. Plitost puspè gervosa e vin. Quai era lura er già tut noss'activitad, seser enturn, cun uschè pauca vestgadira pussaivel a baiver vin.

Umens mez bluts enturn ins che servan ins anc cun alcohol... tuna sco or dad in siemi. E daventà vardad, bunamain. Il problem è mo, ch'ins sto era prender en cumpra las schnoccas che correspundan plitost mo al humor masculin e tut lura basegns dad esser uschè natiral pussaivel.

Jau sun cuntenta che jau poss bainbaud ir a star ensemen cun ina matta. A Cuira, mia proxima staziun. Ma deplorablamain n'è ella betg suletta. Era ella viva cun dus mastgels! Cun num Speedy e Tequila. I sa tracta da giats.

Tranter umens – Chatrina Josty, studenta a Fribourg scriva da sia vita en ina WG cun dus umens.